

【蛻變】徐佳好原作

記得俅仔讀小學个時節，放學轉到屋下興蹠蹠仔¹摺俅分享，上自然課，先生紹介蝶仔，佢試著當生趣，問俅：「阿姆，做得畜弄毛蟲無？」俅斯聽過有人畜細魚仔、蠶仔、雞油蛄，敢有人畜弄毛蟲？

該時，俅在學校做志工，摺圖書室个細阿姊仔打嘴鼓，佢講：「斯愛種一頭柚仔樹抑係柑仔樹，就會有蝶仔飛來生卵。你再過準備一隻罐仔，裡肚放一支細樹樅，恁樣就做得咧。」俅一聽著，心肝肚當疑狐：自家又無戴在莊下，種一頭柚仔樹就會錫蝶仔來，哪有可能？毋過，「狗呷烏蠅，賭造化」²罔試看仔。

講來盡奇怪！有一日，正經有一隻蝶仔，在俅兜種个柚仔樹脣飛來飛去、飛上飛下。俅心肝肚恤：「佢在該做麼个呢？」俅目金金緊看，佢一頭緊攞翼，一頭對屎肫尾屙出細細粒、黃淦淦个卵在葉仔面頂。俅細心細意，摘下這皮葉仔帶轉屋下放落罐仔裡背。

幾日過後，幼蟲對卵肚鑽出來，一出世，黏時摺卵殼食忒。

弄毛蟲當揀食³，斯食合意个葉仔，像一個肚屎當枵个細孺仔，葉仔分佢食到淨—淨—淨—，斯伸著葉脈，俅仔都赴毋掣摘葉仔分佢食！佢兜緊食膺身緊大籐，白烏色个衫褲忒狹咧，斯脫下舊衫換過青衫。

成時，蠻皮个俅仔係「頭那插禾串」撩佢，佢會黏時臥起圓圓大大个頭那，摺伸出紅紅个角，放出像榴槿樣臭胖胖个味道，想愛嚇走欺負佢个人；毋過，若係正經堵著烏仔、虎頭蜂，佢兜斯插都毋插。有一擺，俅識看著自家畜个弄毛蟲，毋知分對哪來个蜂仔食忒，衰過个弄毛蟲，瀉都毋掣！一無注意，嘎發生恁悽慘个事情，實在得人驚！

弄毛蟲逐日都盡命牯食葉仔，食到膺身肥固固⁴毋知飽。有一暗晡，看佢迂迂轉⁵，葉仔毋食，斯在罐仔肚趲來趲去，毋知在該無閒麼个。佢屙一埕青青个落粃，俅仔問：「佢係發病仔抑係屙痢肚？」突然間，佢趲在該樹樅頂，呷絲摺自家吊等又過跣等，園在蠶包裡肚，像人⁶睡忒咧！

經過一禮拜零，蠶包變色，像變奇術樣，蝶仔對蠶包裡肚鑽出來咧！毋過，溼溼、皺皺个翼還言燥，佢定定仔、柔柔仔，當有耐心个等待，正經係老古人言講：「甘蔗食了一目正一目」，毋好「打卵就愛見黃」。看著這靚膩膩个花仙子，當像係摺俅兜講等人生盡多个道理。

¹ 興蹠蹠仔：音 himˋ diaˋ diaˋ er；興沖沖的。

² 狗呷烏蠅，賭造化：音 gieuˋ gabˋ vuˋ rhin, duˋ co+ faˋ；狗突然張口去咬飛過的蒼蠅，能否咬到就看運氣。

³ 揀食：音 ganˋ shidˋ；挑剔食物。

⁴ 肥固固：音 pui guˋ guˋ；胖胖的。

⁵ 迂迂轉：音 dinˋ dinˋ zhonˋ；轉個不停，此處形容躁動不安。

⁶ 像人：音 ciongˋ ngin；好像。

編號 2 號

【阿咪¹】李夢花原作

佢屋下從來就毋識畜狗畜貓仔，一來係阿姆歸日做事無閒直掣，又愛無閒煮三餐，二來係佢當愛淨俐，畜狗摻貓仔驚怕會遶跳蚤。一直到老弟間房个天篷頂，逐暗晡一群老鼠在該走來走去，並並磅磅²吵到佢睡毋得，正高不將摻上屋个鄰舍，捉一條細貓子畜來打老鼠。

鄰舍个貓嫲這胎正降兩條，一條就係佢屋下這條，灰色間³白色摻豬肝色花刺花刺⁴，看起來當精靈、當得人惜，佢兜喊佢「阿咪」。另外該條柑仔色間白色，乜已靚，分雜貨店个叔姆捉去畜。阿爸講新捉來个貓仔，定著愛綯在有四支桌腳个下背幾日仔，恁樣正會認屋，阿爸就摻佢綯到桌腳下。正經有影哦！幾日仔放佢，阿咪就乖乖乖，毋會亂採走。

因為毋識畜過貓仔，阿姆乜毋知愛分佢食麼个？人講：貓愛食臊。阿姆就用四破魚攪飯飼。一站仔過後，阿爸講：「毋好分

佢食忒好、食忒飽，慣勢咧就毋會去打老鼠。」聽雜貨店个叔姆講佢屋下該條，就係食到肥固固，日日食飽睡、睡飽食，連老鼠在脣頭過，佢斯目珠擘開睜一下，做佢睡。該幾日逐朝晨，阿爸就去豬砧買一坵豬肝分阿咪食。第一擺豬肝買轉來，阿姆愛拿來煮熟，阿爸煞煞講：「分貓仔食生豬肝，係愛佢慣食生个味，正會去打老鼠，該下二擺佢打著个老鼠，你愛煮熟正分佢食係無？」阿爸講个已有理，佢兜聽了哈哈大笑。

阿咪日時頭走到倉庫睡目，暗晡頭就係佢行動个時間，在暗摸脣疏个暗晡頭，看著佢个目珠仁，像兩粒青色个寶石樣當金當靚，灶下个蜞蜚仔趕來趕去，佢一爪搭一隻，非常流掠。就毋知佢曉打老鼠無？毋過，自阿咪來了以後，老弟間房个天篷，就無老鼠在該跳舞咧。

毋多知仔，阿咪畜有十四年咧，照偲人个年紀算，佢有七十零歲咧。該日阿咪懶蜴蜴仔無精神，食个東西又嘔出來，好得看過獸醫、注射過，幾日仔就好咧。阿姆笑笑仔對阿咪講：「你摻佢共樣，老咧。」阿咪當像聽得識樣，第二日打條細老鼠挑挑放在灶下，像係愛摻阿姆講：「莫笑佢老刀嫲無鋼——奈毋何，佢還已慶哪！」動物除了毋會講話，佢兜摻人共樣，係有感情、有靈性个，還有該種毋認老个打拚精神啊！

¹ 阿咪：音 a+ mi；專有名詞。貓的名字。

² 並並磅磅：音 binˋ binˋ bongˋ bongˋ；狀聲詞。形容老鼠在天花板跑動的聲響。

³ 間：音 gamˋ；混合摻雜。

⁴ 花刺花刺：音 faˋ laˋ faˋ laˋ；形容顏色混雜花花的樣子。

編號 3 號

【大箍牯減肥記】曾菁怡原作

「哇！歸桌恁多好料！汽水、餅、披薩、雞卵糕、枝冰，還有佢最好食个焗菜、雞髀。」佢看到無瞞目，口水強強會跌下來，該兜好料像人摻佢攞手講：「遽遽來食，遽遽來食㗎！」佢煞煞抓一支香噴噴个雞髀，該油光油光个皮焙到赤赤，肉汁汀汀汀汀，實在還錫人哪！就在佢嘴擘到大大，準備咬下去該下，嘎聽著：「大箍牯，還毋翫床？讀書會赴毋著咧！」全部个好料一下嘎毋見忒，原來，係發夢啊！有一息仔毋願，該雞髀無咬著，實在還打爽哦！

聽佢姆講，佢從細就已好嘴斗，生到肥卒卒仔，幼皮白肉，當得人惜。公太就最愛捏佢个面頰卵，講佢像正打好个粢粢樣，分人想愛咬一口。本旦佢無感覺肥固固个身材有麼个毋好，毋過該擺見笑个經驗分佢決心愛減肥咧。

該日學校辦校慶活動，佢个班級表演「三隻豬子」个話劇，佢係擔任豬大哥个角色。在節目進行到豬大哥摻豬二哥為著閃避大野狼，愛走去豬老弟个屋肚園該下，為著有緊張个氣氛，佢盡命牯颯過去愛鑽落豬老弟个屋肚。麼人知，一下忒大力，豬老弟

个屋嘎分佢撞橫忒去，佢還仆在屋面頂，屎肫翹到半天高，纏繃繃个褲弓到暴線縫，該時，鬧熱煎煎个禮堂忽然間變到肅恬¹，佢還聽得著自家砰砰滾个心跳聲，額頭流下來个每一滴汗水，就分佢感覺得著實在還見笑哪！愛仰結煞正好？背尾，有聲音摻佢解圍咧，佢遽遽企起來行到舞臺脣頭換褲，該聲音，毋係佢期待个拍手聲，係大家笑到歸身緊顫、目汁雙流个笑聲。

校慶結束該日，桌頂个乳茶、雞排全部分佢擲到垃圾桶，佢第一擺有恁堅定个決心，絕對愛減肥成功。佢去網路尋減肥个方法，大體係減量、減油、減糖，還愛配合適當个運動，所以該兜油膩膩个焗菜、甜漬漬²个汽水、糖仔全部分佢拒絕，逐餐飯菜都食較清較齋兜，食到七分飽就好。佢還逐日運動三十分鐘，行路、打球仔、跳索仔……，逐日做無共樣个變化。

一隻月過後，佢姆渡等佢去買新衫，逐領个尺寸都減忒兩號，阿姆講：「從今以後做毋得再過喊你『大箍牯』咧。」「係啊！你愛喊佢『緣投哥』哩㗎。」

大箍牯減肥，成功！

¹ 肅恬：音 sog diam`；形容安靜無聲的樣子。

² 甜漬漬：音 tiam zid` zid`；味道很甜。

【擲牙齒】張旭英原作

堵好係換牙齒个七、八歲，舊个牙齒𠵿𠵿¹，新牙斯暴出來咧，就係人講个生豬哥牙啦，又恁堵好係頭前个大門牙，係講無先摺舊牙擲𠵿，一方面驚怕會影響新牙个生長，另一方面細阿妹仔个門面就會𦍋²到看毋得。

就恁樣，第二日𦍋爸渡𦍋坐巴士去街路个齒科擲牙齒，還當記得，愛去街路个前一暗晡，𦍋姆遽遽用裁縫車踏踏仔，兩下半就做好一身洋裝，愛分𦍋著去街路擲牙齒。毋知係毋係著新衫心頭歡喜，對黏時愛擲牙齒試著無恁發痴驚³，到先生該位，護理師先摺𦍋注痺射，先生一下手⁴擲𠵿四支舊牙，護理師喊講棉仔愛出力咬等，麻藥𠵿過，所以也無感覺著有幾痛。坐有一下，護理師講做得轉去咧！拿好藥包，交代講係止痛藥，實在當痛，痛到佇毋著就愛拿來食，係講會試著毋鬆爽，就愛倒轉來分先生看。

𦍋跔等𦍋爸後背，準備愛行去赴車枋，欸！仰毋係行去車頭

个方向，該量時𦍋還無法度講話，用手拉𦍋爸个衫腳，指等車頭該片，提醒佢行毋著咧，𦍋爸笑咪咪仔講，偲俚兩儕先來去食一碗冰正去坐巴士。包尾𦍋正知，𦍋爸驚𦍋痺藥過𠵿開始會痛，又知得棉仔拿𠵿定著會出血，食冰暫時做得止血止痛。該碗冰係清冰，白雪雪个冰淋一息仔烏糖水，該冰冰、涼涼、甜甜个味緒，𦍋永久記得。下後再過點清冰來食，𦍋噯尋毋著當時該種味緒。

擲𠵿四支牙齒个𦍋，跔等𦍋爸歡歡喜喜食冰，又安安心心坐等巴士轉屋下，毋知續下來還有愛面對个事情，第一，就係暫時做毋得食硬飯，斯做得食糜、食麵；第二，少𠵿四支牙齒，暫時變到當毋好看，會分人笑「缺牙耙」。仰結煞正好呢？該量時𠵿有揸嘴仔⁵好戴，斯做得嘴微微⁶毋好講話，就毋會分人看著𦍋个牙齒少𠵿四支咧，還有食糜、食麵，驚怕愛食一駁仔哩啲！

這下𦍋个門牙生到齊齊正正，除𠵿愛感謝𦍋爸个智慧，還有𦍋姆做一身新衫分𦍋，正分當少出門个細阿妹仔增加多多少少勇氣，做得勇敢去面對擲牙齒个事情。

¹ 𠵿𠵿𠵿：音 mang lud ted；還沒從附著的物體上掉下來。

² 𦍋：音 zhe'；形容醜陋的樣子。

³ 發痴驚：音 bod chi` giang`；受到驚嚇而心中感到害怕，甚至起雞皮疙瘩。

⁴ 一下手：音 rhid ha+ shiu'；一口氣。

⁵ 揸嘴仔：音 em` zhoi` er；口罩。

⁶ 嘴微微：音 zhoi` mi` mi`；嘴巴閉著。

【 蛎蠕仔¹ 】徐姿華原作

記得讀兩年生該年，連續漚水²幾下禮拜，落到人都硬硬會生菇咧！直直到拜三朝晨斷水腳³，當晝放學還有日頭花對貴貴个烏雲肚箭出來，大家都當歡喜，排列仔行出校門，著等水靴蠻皮个細佬仔斯開始涉水⁴搞，泥水激到脣頭个細妹同學噍噍滾⁵，緊閃、緊跳、緊走，笑聲、叫聲、罵人聲，襯等轉好天个天時，大家个心情乜像慢慢散忒个烏雲緊來緊開。

佢摻老弟轉到屋面前个楓樹伯公下，看著一陣細細尾、頭大大、烏烏个魚仔在路脣落水過後个細水窟肚，汨來汨去當生趣，佢兜跼等看到毋記得好轉，阿婆等無人，行出禾埕大聲喊，佢兜正當毋甘願行轉屋下。

佢兩儕晡等阿婆去睡當晝該下，偷偷仔拿等空个乳粉筯，去楓樹伯公下捉魚仔，驚大人知著會罵，佢兜斯摻捉著个六尾魚仔，偷偷畜在書桌下，愛去上課摻放學轉都會先去看一下，等愛寫字該時正摻佢兜拿出來放在桌頂，陪佢兜寫字。

第三日打早，老弟去看魚仔了後趕緊愛去上課，乳粉筯無放好勢嘎橫忒，等佢兜下晝轉到屋下，水硬硬會流忒咧，筯町淺淺个水肚伸著一尾魚仔定定，另外五尾魚仔燥死在書桌下咧。佢兜當傷心，摻五尾魚仔埋在花園肚个桂花樹下，希望佢兜做得鼻得著桂花个香味。伸著該尾細魚仔，佢兜還較細心細意照顧佢，大約一禮拜換一到水，還分佢食嫩嫩个菜葉。

十空日過，該尾魚仔嘎生出兩隻腳，佢兜試著魚仔會生腳當生趣，忍毋核偷偷摻阿爸講，阿爸看了以後講：「該毋係魚仔，係『蛎蠕仔』、蛎仔个細人仔。」差毋多又過一禮拜，蛎蠕仔又生出前腳咧，有四隻腳還有尾，在水竇肚汨來汨去，當風神。

學校放避暑咧，阿姆摻往年共樣帶佢兜轉姐婆屋下奈一禮拜，佢兜心肝肚掛吊等書桌下个蛎蠕仔，言曾言抵⁶斯緊討愛轉。一轉到屋下，老弟黏時飄落間肚，續等斯噉到大嫲牯聲，佢兜來毋掣攬包袱，斯走落間肚去，看佢做麼个噉？老弟指等空空个乳粉筯，摻脣頭該跳啊跳个蛎仔，噉到宰噉⁷講：「鳴……蛎蠕仔……分蛎仔食忒咧啦！鳴……」，阿爸聽著，緊掌老弟个頭那，忍等笑摻老弟講：「戇佬仔，你个蛎蠕仔大咧，變到蛎仔咧啦！毋係分蛎仔食忒。毋好噉啦！」老弟聽著恁樣講，正有笑容。

因為童年畜「蛎蠕仔」个經驗，分老弟對自然科學當有興趣，這下老弟已經係當受學生仔歡迎个自然科先生咧，乜輒輒會渡細人仔滿哪仔去做研究呢！

¹ 蛎蠕仔：音 guai' nug er；蝌蚪。

² 漚水：音 eu' shui'；久雨不停。

³ 斷水腳：音 ton' shui' giog；雨停了。

⁴ 涉水：音 zheb' shui'；以腳踩水嬉戲。

⁵ 噍噍滾：音 ngiau ngiau gun'；連聲抗辯的樣子。

⁶ 言曾言抵：音 mang cien mang di'；時候未到，迫不及待。

⁷ 宰噉：音 sud' ed'；情緒激動，哭得喘不過氣來。

【好空】徐子涵原作

人講，笑頭笑面个人較有人緣；佢講，會講客个細人仔較得人惜。係兩種加起來，就會變出當多好空个事情來哦！

社區肚个老老嫩嫩，佢比佢姆還較熟事；社區肚个事情，乜比佢還較瞭解。成時攞兜菜、帶兜糖仔轉屋，騙阿姆講係佢買个，佢都會相信。因為連佢都想毋著，無緣無故有麼儕會分佢。無論係食个、著个、用个，抑係搞个，所有好空个，通棚都係佢好嘴碼摺禮貌換來个。

對門九十六歲个阿太講，這下个細人仔，毋知係畏羞抑係搨屎，盡少像佢恁有笑容、恁會摺人相借問个，所以特別惜佢，盡安謐佢。佢長下會攞手喊佢過去，拿兜零嗒分佢食，佢講就佢正有恁好空。摺佢講話，全全愛用客話講，佢正聽得識，佢想怕係因為恁樣，正無細人仔愛摺佢講話。三條巷仔个細人仔，斯單淨佢一儕做得摺佢謔多半點鐘久，無講花舌哦！

莫看佢年紀還細，係自行車落鏈，抑係輪仔摺球仔無風，佢自家就有辦法，毋使花錢去尋人搨手整、搨手嘮風。係愛打羽毛球，乜有大人伴陪佢搞，恁樣講，你就知佢个朋友有幾多、年齡

層有幾闊咧！

細人仔自然就會搞共下，毋使加講，愛講个係，該兜鄰舍做麼个會恁惜佢呢？該係因為佢當笑面，會摺人打嘴鼓，還會摺人搨手。比論講搨手倒垃圾、拚資源回收个東西、講兜笑科分人笑、講兜令仔分佢兜揣、講兜生趣个事情分佢兜聽，就連老伯姆來賣菜，佢乜會搨手喊：「買菜哦！愛買菜無？」微微末末，講都講毋得煞，佢个大人朋友就係恁樣從細交陪來个，連佢姆都當佩服。

對巷仔口左幹上去个有錢人家摺公園起到當闊，新聞報導了後，斯當多遊客來遠寮，漸漸仔乜有人來擺攤仔做生理。佢輒輒會行兼去，人客來就搨手，無人客就打嘴鼓，毋多知仔又熟事咧！已多遊客聽著佢講客，會因為試著當親切，就加買兜仔，你講，有生趣無？

佢從來就無想著面帶笑容摺講客會有麼个好空，毋過確實帶分佢盡多好空！總講，就係一種當湛斗个感覺。

【剃頭】張美容原作

前幾日去剃頭店剃頭，看著一個兩、三歲个細人仔，為著剃頭噉到噉殺天¹，大人細子全部斯搥到汗流脈絡，實在還衰過哪。佢這下較大咧，剃頭該時毋敢噉，毋過還係恁驚剃頭，乜共樣恁惱剃頭！

佢驚剃頭，係因為佢當無膽，驚師傅手町該支剪刀摺剃頭刀。見擺一坐落凳頂，冏好剃頭怕，看著師傅擎等剪刀對等佢，佢就開始嘩嘩掣²，試著過忒千年恁久毛正剪好，堵堵想故下大氣定，師傅又擎等利利个剃頭刀愛來刮佢腦屎背³个毛腳，這下還較得人畏咧。佢驚到頸根緊跣、屎肫在凳頂扭上扭下，師傅一頭刮、一頭咄⁴佢毋好停動，無奈何，佢牙根齧等、拳頭嫲搭等，由在人剝割。係走得得，佢定著起腳花走⁵，一分鐘就毋停跔。唉！剃頭實在得人驚！

到三、四年生起勢，膽較在⁶咧，無恁驚剃頭，噯變到惱剃

頭，因為師傅該張嘴當得人惱，佢總係在摺佢剃頭該時，講講掣一千擔有个無个。可能大家係老鄰舍昶⁷熟事咧，佢長下緊剃緊摺佢打嘴鼓，一下問：「你个頭那毛落麼个肥，仰會生到恁靚、恁多？」一下又講：「營養毋好專門搵到頭那毛去，愛食較高大大兜正有影哪！毋好像矮嫲車樣矮佢佢仔⁸。」佢面皮薄、驚見笑，長下目珠眨等詐無聽著，一肚懊躁想：「仰結煞！脣頭个人定著在該笑佢咧啦！還惱！還惱！實在還惱剃頭。」

最冤枉个係，有一擺師傅毋知仰般，剪刀一溜⁹，噯摺佢个耳砵剪隻空，血黏時流出來。師傅一頭摺佢膏藥仔，一頭濃濃哂哂講：「頭那毛恁多，當毋好剪。」仰般噯變成佢个錯！轉到屋下想愛摺阿姆做嬌，無想著阿姆毋單淨無安慰佢，顛倒罵佢講：「毋恬恬坐等分人剃哪！耳空無分人剪忒斯已好咧。」限勢佢愛噉毋得嘴扁，聽著阿姆恁樣講，黏皮「哇」一聲噉出來。係做得，佢甘願鬢頭髻披¹⁰乜無愛去剃頭。

剃頭个齣事，幾隻月斯愛再過來一擺，還艱苦哪！佢日日想、日日望，想望煞煞大，做得像大人樣，去電毛店剪頭那毛，腳交等，有冷氣好吹、有人摺你捉龍，還有人淳茶分你食，毋知幾好哪！

¹ 噉殺天：音 ve vong sad tien`；大聲哭喊

² 嘩嘩掣：音 bid bid chad；不停發抖。

³ 腦屎背：音 no' shi' boi`；後腦杓。

⁴ 咄：音 doi；喝斥。

⁵ 起腳花走：音 hi' giog fa` zeu'；拔腿就跑。

⁶ 在：音 cai⁺；穩固。

⁷ 昶：音 tiong'；太。

⁸ 矮佢佢仔：音 ai' dud dud er；矮嘟嘟的。

⁹ 溜：音 tiu`；滑開。

¹⁰ 鬢頭髻披：音 nung teu gi` pai`；披頭散髮。

【孤栖个白鸚哥¹】彭瑞珠原作

佢去學校个路町，會經過一頭當大頭个樣仔樹²。朝晨，佢遠遠就聽著，當多鳥仔在樹頂搞到盡大聲，當鬧熱。一開始，係幾隻白頭殼仔在該緊講：「出力，出力！出力，出力！」；續等，青啾仔³乜來加油講：「遽遽，啾啾！遽遽，啾啾！」；過了，係一陣屋簷鳥「唧唧唧唧、唧唧唧唧」在樹頂開會个聲哨。

佢想，今晡日仰會有恁多鳥仔在樹頂搞呢？係，熱天个樹頂較涼爽？抑係，樹頂還有當多樣仔好食？佢臥頭看往上，無啊，樣仔都分人摘淨淨咧，斯伸著一樹个青葉定定。還過，啾啾滾个鳥仔，乜看毋著半隻，就聽著屋簷鳥還在該開會个聲定定。毋過，屋簷鳥實在昶⁴細隻咧，園在比佢兜大恁多个樣仔葉裡肚，佢當然也看無。

日時頭，佢還在該緊想，仰明明聽著恁多鳥仔聲，又看毋著半隻，行過樹下，乜無看著鳥仔飛走啊，還怪奇唷！放學个時

節，佢共樣行該條路，還ㄍ行到樣仔樹下，就看著樣仔樹脣頭个楊桃撥撥跌⁵咧。佢看一下四圍，無風啊，過看一下楊桃樹頂，無人啊！該，楊桃仰會自家跌下來呢？佢行過去看，會行到樹下，就聽著樹頂有英文摻佢講「哈囉⁶！」

原來，係一隻調皮个白鸚哥。朝晨，樹頂該陣鳥仔聲，就係你㗎！遠遠有鳥仔飛過，你就摻人喊加幾聲仔鬥鬧熱，難怪佢會聽著恁多鳥仔聲，又看毋著鳥仔。佢乜行過去摻佢「哈囉」，毋過，佢全無插佢。

像係發性⁷个細人仔樣，佢嘴嘟嘟仔，用腳抓⁸起一隻楊桃、喫一口就摻佢擲忒。楊桃還ㄍ跌落地泥，佢又抓起另外一隻楊桃來喫，大隻、細隻，有熟、ㄍ熟个楊桃，分佢擲到一地泥就係。

白鸚哥，係毋係昶孤栖咧？雖然，佢無插佢，佢還係「三隻鼻空」，已閒管个勸話佢講：「白鸚哥啊，你毋好恁樣！楊桃又無得失你，做麼个尋佢兜出水呢？你屋下人，乜怕係尋你尋到當愁哦！你愛轉去無？你係孤栖，佢來摻你做朋友，好無？」

¹ 鸚哥：音 en` go`；鸚鵡。白鸚哥，白色的鸚鵡。

² 樣仔樹：音 son` er shu+；芒果樹。

³ 青啾仔：音 ciang` ziu er；綠繡眼。

⁴ 昶：音 tiong`；太。

⁵ 撥撥跌：音 bad` bad` died；紛紛掉落。

⁶ 哈囉：音 ha lo`；源自英文 Hello，你好之意。

⁷ 發性：音 bod siang`；鬧脾氣。

⁸ 抓：音 sa`；抓取。